

- Հազիւ երկու տարուան կայ, տիկի՛ն:
 - Զիս կծաղրէ՞ք կոր, մաղամներ:
 - Ծաղրելու ի՞նչ կայ, տիկի՛ն:
 - Վնաս չունի. բայց ինձի ըսին, թէ քառասունի մօտ է եղեր, եւ մօրուքին մէջ ճերմակ ալ ինկեր է:
 - Ի՛նչ... մօրո՛ւք... մեր ընկերութիւնը մօրո՞ւք ալ ունի եղեր...
 - Ձեր ընկերութի՞ւնը...:
 - Հապա դուք որո՞ւ համար կխօսէիք:
 - Մեր փեսացոյին համար չէի՞ք խօսեր:
 - Ներեցէ՛ք տիկին. սխալմամբ հոս եկած ենք... Պ. Ի...եանի տունն ո՞ւր է:
 - Մեր քովի տունն է:
 - Թողութիւն կ'ընէք, մենք ընկերութեան մը համար դրամ հաւաքելու ելած ենք այսօր:
 - Դուք ալ ներեցէ՛ք, ես ալ աղջիկ - տեսի համար հիւրերու կսպասէի այսօր:
- Հիւրերը կբաժնուին տիկին Թ...է, որ պատուհանին առջեւ կ'անցնի կը նստի իւր բուն հիւրերը սպասելու:

4 Սեպտեմբեր

Եթէ Հայաստանի մէջ բարենորոգում լինի՝ նմանը չտեսնուած արիւնհեղութիւն մը տեղի պիտի ունենայ եղեր հոն: Քիւրդերը վախ չունենալով ո՛չ Ռուսիայէն եւ ո՛չ Եւրոպայէն՝ հաւու պէս պիտի մորթեն եւ պիտի ուտեն եղեր հայերը:

Այսպէս կը խօսի տաճկական մամուլն, որպէս զի Եւրոպան փոխէ իւր ընթացքը, զոր որոշած է բռնել արեւելեան առկախ խնդիրներուն լուծմանը համար...

6 Սեպտեմբեր

Նոր դազարուհի մը:

Հայ կին մը, որ ժամանակէ մ'ի վեր հիւանդ էր՝ առջի օրը թաղուելու տարուած ժամանակ դազաղին մէջ կը նստի եւ խմելու ջուր կ'ուզէ:

Մասիս այս դէպքը յիշելով կ'ըսէ.